

G. generalni sekretaru,
Vaše ekscelencije,
Dame i gospodo

Prije svega, dopustite mi da vam se zahvalim na pozivu da učestvujem u panel diskusiji *Pet godina Vijeća za regionalnu saradnju: gradimo na temeljima, u susret novim izazovima*, i ceremoniji obilježavanja pete godišnjice Savjeta za regionalnu saradnju.

Regionalne inicijative predstavljaju okvire u kojima nam je cilj da uspostavimo trajan mir i prosperitet za narode u regionu jugoistočne Evrope. Tokom prvih pet godina od svog nastanka, RCC je postao jedan od ključnih regionalnih igrača i neophodan partner u ukupnim procesima regionalne saradnje.

Implementacijom Strategije i Programa rada RCC-a (SWP) za 2011.-2013., ispunjen je niz konkretnih ciljeva u svakoj od prioritarnih oblasti. Postignut je i napredak u izgradnji kapaciteta zemalja u regionu da zauzmu zajednički stav u formuliranju dostižnih ciljeva na regionalnom nivou, te u jačanju sinergije u njihovim regionalnim aktivnostima. Primjetna je i efikasna saradnja i koordinacija sa predsjedavajućim Procesu saradnje u jugoistočnoj Evropi (SEECF), kao i u procesu racionalizacije regionalnih inicijativa i radnih grupa u JIE.

Dozvolite mi da još jednom istaknem povećan nivo sinergije između predsjedavajućeg SEECF-a iz Srbije i RCC-a koji je, čvrsto sam uvjeren, dodatnim kvalitetima doprinio daljem jačanju odnosa između naših zemalja, te odnosa između regiona i Evropske unije.

Uvjeren sam da će RCC nastaviti da radi na povećanju svoje uloge u regionalnoj saradnji, na taj način promovirajući pitanja koja su značajna za cijeli region. Čvrsto vjerujem da će i u budućnosti, kao i do sada, RCC učestvovati u promoviranju sveobuhvatne i održive regionalne saradnje, u cilju jačanja opće sigurnosti i stabilnosti, ekonomskog i socijalnog razvoja, poštivanja vladavine zakona, efikasnog korištenja resursa i dobrog upravljanja u JIE.

Dame i gospodo,

Kao što svi vi znate, Republika Srbija priznaje značaj saradnje između zemalja za ekonomski razvoj regiona, njegovu sigurnost i stabilnost, kao i za proces evropskih integracija u svim zemljama aspirantima. Jednostavno rečeno, regionalna saradnja je jedan od kamena temeljaca vanjske politike Srbije.

Procjenjujući dosadašnje učešće RCC-a kao aktivnu i važnu pozitivnu promjenu u imidžu regiona, Republika Srbija ostaje potpuno opredijeljena za dalju saradnju sa RCC-om na implementaciji i promoviranju projekata u oblastima od zajedničkog regionalnog interesa.

Vjerujemo da je projektno orijentirana regionalna saradnja ključni mehanizam za efikasnu implementaciju političkih i ekonomskih prioriteta svih zemalja u regionu.

Energija, infrastruktura i transport od vitalnog su značaja za svaku zemlju. Sve je više regionalnih projekata i programa u ovom domenu. Da bi svi oni zabilježili istinski uspjeh za dobrobit građana regiona, snažno podržavamo koordinirajuću ulogu RCC-a.

Republika Srbija je zainteresovana za unapređenje okruženja za investicije u regionu. Snažno podržavamo regionalnu saradnju i u drugim oblastima u okviru RCC-a. Naravno, među prioritetima su borba protiv organizovanog kriminala i korpucije, kao i saradnja u oblasti sigurnosti, što predstavlja osnovu za stvaranje stabilnih i modernih demokratija u današnjem svijetu, kao i za planiranje budućnosti.

Posebna pažnja je usmjerena na jačanje ljudskih potencijala, promoviranje principa ekonomije zasnovane na znanju i primjenu modernih informacijskih tehnologija. Na naše veliko zadovoljstvo, u Srbiji će biti sjedište Sekretarijata Inicijative za reformu obrazovanja u juigoistočnoj Evropi.

Dame i gospodo,

Htjela bih iskoristiti ovu priliku da još jednom pohvalim vrijedan rad bivšeg generalnog sekretara RCC-a Hide Biščevića i članova njegovog tima na postizanju spomenutih rezultata, kao i ulogu zamjenice generalnog sekretara RCC-a, gđe Jelice Minić i ekspertnog tima u organiziranju važnih događaja i promoviranju regionalnih inicijativa i radnih grupa.

Još jednom potvrđujemo našu punu podršku g. Goranu Svilanoviću, novom generalnom sekretaru RCC-a. Njegovo imenovanje za novog generalnog sekretara RCC-a posmatra se kao prilika za dalje unaprjeđenje uloge RCC-a i nadgradnju njegovih dosadašnjih rezultata. Ohrabrujemo ga u izvršavanju njegove zahtjevne misije, i želimo mu svu sreću.

Nadamo se da će Evropska unija nastaviti da radi sa nama na jačanju evropskih vrijednosti, ubrzavanju i racionalizaciji procesa integracije ovog regiona u evropsku porodicu, gdje s pravom i pripada. Budite uvjereni da će Srbija i dalje biti pouzdan i proaktivan partner na ovom putovanju.

RCC, sretna peta godišnjica!